



INATSISARTUT

Aningaasaqarnermut Akileraartarnermullu Naalakkersuisoq

Ulloq: 15. oktober 2024

J.nr.: 01.31.06/24-01097

Aningaasaqarnermut Akileraartarnermullu Ataatsimiititaliap pingasunngornermi ulloq 9. oktober 2024-mi aalajangiineranik Naalakkersuisunut ilisimatitsineq.

Sikorsuaqarnerata malitsigisaanik Kujataani takornariartitsinermik inuussutissarsiorfimmumut ikiorsiissuteqalersitsinissamut ilassutitut aningaasaliissutit. Ataatsimiititaliap suliaa nr. 01.31.06/24-01097

”Naalakkersuisut inassutigaa,

- Missingersuutitut ilanngussaq ilanngussatut ilanngunneqartoq naapertorlugu 0 koruuninik aningaasaliissutitalerlugu, 2024-mut ilassutitut aningaasaliissutitut inatsisissatut siunnersuummi konto pingaarneq 67.03.08 Kujataani sikorsuaqarnera tunuliaqutaralugu immikkut ittumik ikiorsiiniutit pilersinneqassasoq,
- Oqaasertaliussaq ilanngussatut ilanngunneqartoq naapertorlugu, 2024-mut ilassutitut aningaasaliissutitut inatsisissatut siunnersuummi konto pingaarnermut 67.03.08 Kujataani sikorsuaqarnera tunuliaqutaralugu immikkut ittumik ikiorsiiniutitut oqaasertaliussat nr. 1-3 ilanngunneqassasut, aamma
- Isummernissamut tunngavissiami matumani nassuiaatigineqartutut malittarisassalerlugu, sikorsuaqarnerata malitsigisaanik Kujataani takornariartitsinermik inuussutissarsiorfimmumut ikiorsiissutitut pilersitsisoqassasoq. Ikiorsiissutit 2024-mi januaarimit septembarip tungaanut atuutissapput, siulianilu taaneqarluni konto pingaarnermit atugassiissutigineqassallutik.”

Aningaasaqarnermut Ataatsimiititaliap oqaaseqaatai apeqqutaalu

Ataatsimiititaliap suliamut apeqqutaanut Naalakkersuisut akissutaat ataatsimiititaliamit qujassutigineqarpoq.

Missingersuutitut ilanngussami kiisalu oqaasertaliussami attuumassuteqartumi konto pingaarnermut 67.03.08-mut, Kujataani sikorsuaqarnera tunuliaqutaralugu immikkut ikiorsiissutitut tunngasumut, ilanngunneqartussamut inassutigineqartumi suliamut ilanngullugu nassiunneqartumi immikkoortoq una allassimavoq:

“Aningaasaqarnermut Akileraartarnermullu Ataatsimiititaliap naatsorsuutigisamik ilassutitut aningaasaliissutitut matuminnga akuersineranut atatillugu, Malittarisassat, ikiorsiissutissallu imarisassat aalajangersarneqassapput.”

Malittarisassanut missingersuutit taakku suliamut ilanngunneqarsimanngimmata akissutitut allakkamini siullermi ataatsimiititaliap taakku ujarorpai. Taamaattumillu taakku tiguneri ataatsimiititaliamit qujassutigineqarput. Matuma kinguliani takuneqarsinnaasutut suliami matumani inassuteqaatit ataatsimiititaliamit akuerineqanngillat. Tamatuma toqqaannartumik kingunerisaatut malittarisassat nassiunneqartut immikkut akuerinissaat pisariaqartutut ataatsimiititaliamit isigineqanngillat. Suliap matuma nukinginnartutut suliarineqarnissaanik Naalakkersuisut qinnuiginninnerat eqqarsaatigalugu ataatsimiititaliap isumaa malillugu naapertuunnerpaasimassagaluarpoq malittarisassat akuerisassanngorlugit suliamut ilanngunneqarsimappata.

Ataatsimiititaliami ikinnerussuteqartut Inuit Ataqtigiit ilaasortaataat suliamut ima oqaaseqaateqarumapput:

“Inuit Ataqtigiit akuersissutigineqarnissaat kissaatigaat. Inuit Ataqtigiit ajuusaarlutik ugguaraat Naalakkersuisut qinnuteqaataat amerlanerussuteqartunit itigartissutigineqarmat. Tamannalu takornariaqartitsinut aammalu aalisartumut piniartunullu kingunerlussinnaanera Inuit Ataqtigiinniit ernumassutiginarpoq.”

Aningaasaqarnermut Ataatsimiititaliap aalajangernera

Siuliani allassimasutut oqaaseqaateqarluni Naalakkersuisut inassuteqaataa ataatsimiititaliamit akuerineqanngillat.

Inussiarnersumik inuulluaqqusillunga



Peter Olsen

Aningaasaqarnermut Akileraartarnermullu Ataatsimiititaliap siulittaasua